

समे – 12:25 hrs.

<><><><><><>

CM-Delegation

मुख्यमंत्री उमर अब्दुल्ला होंरें केई सारे प्रतिनिधिमंडलें ते व्यक्तिगत तौर पर लोकें कन्ने अपने राबता दफ्तर च मलाटी कीती। इस दरान लोकें दिएं समस्याएं सने विकास सरबन्धी कई मामलें गी मुख्यमंत्री होंरें सुनेआ। कश्मीरी लोक कलाकारें दे इक प्रतिनिधिमंडल नै उन्दे नै मलाटी कीती। इस दरान कलाकार समुदाय गी दरपेश समस्याएं गी उजागर कीता गेआ। एहदे अलावा होर कई सारे प्रतिनिधिमंडलें ते व्यक्तिगत तौर पर लोकें उन्दे कन्नै मलाटी कीती। मुख्यमंत्री होंरें भरोसा दोआया जे उन्दे जायज मसलें गी मुतल्लका मैहकमे अग्गे रक्खेआ जाग तां जे उंदा हल होई सकें।

<><><><><><>

IMCT

अंतर मंत्रालयी केंद्री टीम नै पुलवामा जिले दा दौरा लाया ते हाल च आए दे हाइ करी उत्थे होए दे नुकसान दा जायजा लैता। इस मौके पर उत्थुआं दे डिप्टी कमिशनर हुंदे अलावा होर दुए वरिष्ठ अधिकारी बी टीम कन्नै मौजूद हे। टीम नै पाम्पोर, काकपोरा ते अवंतीपोरा दा दौरा लाया ते उत्थे बागें, शिड़कें ते पुलें गी पुज्जे दे नुकसान दा जायजा लैता। पुलवामा दे सर्किट हाउस च इक जायजा बैठक लाई गई। केंद्री टीम नै जिला प्रशासन आसेआ कीते जा करदे

कम्मै दी सराहरा कीती। इस दरान एह बी जानकारी दिती गई जे जेड़ा बी आंकलन इस दरान कीता गेआ ऐ, ओहदे बारै रिपोर्ट केंद्र सरकार गी सोंपी दिती जाग।

<><><><><><>

Union Sec Handicrafts

केन्द्री कपड़ा मंत्रालय दिएं सचिव नीलम शम्मी राव होरें जम्मू-कश्मीर च दस्तकारिएं ते हत्थखड्डिएं सरबन्धी खेतरें दा जायजा लेंदे होई छड़ा प्रमाणिक ते भरोसेमंद उत्पादें गी बढ़ावा देने ते नकली उत्पादें पर रोक लाने लेई जांच ते प्रमाणन आहली इक तगड़ी प्रणाली दी जरूरतें पर जोर पाया ऐ। श्रीनगर दे अपने दौरें दरान केन्द्री कपड़ा सचिव होरें सब्भनें सरबन्धत धड़ें कन्नै गल्लबात करदे होई निर्यातें गी बढ़ावा देने, कारीगरें गी मदाद देने ते बजारें दी पुज्ज बधाने सरबन्धी योजनाएं पर चर्चा कीती। उंनें कल्याणकारी योजनाएं, जि'आं पेंशन योजनाएं ते कारीगरें दे बच्चें लेई वजीफा योजनाएं दे दायरे दा विस्तार करने दी जरूरतें पर जोर पाया तांजे इस खेतर गी मजबूती दिती जाई सकें ते कन्नै कम्म-रोजगार दे मौकें च बी सुधार होऐ। सचिव होरें दस्तकारी उत्पादें पर जीएसटी दिएं दरें च हाल च कीती गेदी कटौती दी सराहना कीती।

<><><><><><>

GST-Reforms Handicrafts

जम्मू-कश्मीर दे बसनीकें ते कारोबारिएं हाल च जीएसटी दी दरें च कीती गेदी कटौती दी घोषणा दा सौआगत कीता। इस घोषणा तैहत केई सारी चीजें च बदलाव होग। इस महीने दी

22 तरीक थमां हत्थ कन्नै बनी दिएं चीजें पर 12 फीसद दे बजाय 5 फीसद टैक्स लग्गोग। एहदे च लकड़ी ते धातु कन्नै बनी दियां मूर्तियां, चित्रकला, लकड़ी कन्नै बने दे उत्पाद, टेराकोटा कन्नै बने दा रसोई दा समेयान वगैरा शामिल ऐ। इस गैंs कन्नै ग्रामीण आजीविका, मुकामी रिवायती कलाएं ते भारत च बने दे उत्पादें गी बढ़ावा थ्होग। आकाशवाणी समाचार कन्नै गल्ल करदे होई किश उपभोक्ताएं आखेआ जे एहदे कन्नै लोकें गी बड़ी मती राहत थ्होग ते लोकें गी भारतीय उत्पाद खरीदने लेई प्रोत्साहन थ्होग।

<><><><><><>

Exam Postponed

जम्मू-कश्मीर ते लद्दाख केन्द्र शासित प्रदेशें च अज्ज लैते जाने तय होए दे 10मीं ते 11मीं जमात दे म्तेहानें गी अगड़ा पाई दिता गेआ ऐ। जम्मू-कश्मीर स्कूली शिक्षा बोर्ड दे डरैक्टर अकैडमिक्स हुं'दे आसेआ जारी इत्तलाह मूजब, डोडा जिले च बने दे कानून-बवस्था दे हालात ते आओजाई पर बंदिशें दे चलदे एह फैसला लैता गेआ ऐ। जम्मू-कश्मीर स्कूली शिक्षा बोर्ड दे डरैक्टर अकैडमिक्स होरें इस फैसले दा ऐलान करदे होई आखेआ ऐ जे विद्यार्थिं दी सुरक्षा, सब्भनें शा पैहली प्राथमिकता ऐ। उंनं इब्बी आखेआ जे एकडे म्तेहानें लेई तरीकें दा ऐलान तौले गे कीता जाहग। विद्यार्थिं ते उं'दे माता-पिताएं गी सलाह दिती गई ऐ जे ओह इस मतल्लक मती जानकारी लेई बोर्ड दे अधिकारिक चैनलें कन्नै जुड़े दे रौहन।

<><><><><><>

Schools Reopened

खिते च भारी बरखें ते हाडें दे चलदे केइएं दिनें तोहड़ी बंद रौहने मगरा जम्मू च अज्ज स्कूलें गी परतियै ऑफलाईन क्लासें लेई खोली दिता गोआ ऐ। पिच्छले दिनें बने दे खराब मौसम दे चलदे प्रभावत होए दे विद्यार्थिएं ते अध्यापकें लेई इसी इक महत्वपूर्ण गैह दे तौर पर दिक्खेआ जा'रदा ऐ। प्रशासन नै इस गल्लै दा जकीन दोआया ऐ जे स्कूलें गी परतियै खोलने शा पैहले सुरक्षा सरबंधी सब्भै लोइचदे हीले करी लैते गेदे न। विद्यार्थिएं ते उं'दे माता-पिताएं स्कूलें गी परतियै खोलने दे फैसले दा सोआगत करदे होई एह मेद बुज्झी ऐ जे अग्गे बच्चें दी पढ़ाई च कुसै किस्मै दा कोई विघ्न नैई पौग ते उं'दी पढ़ाई दा नुक्सान बी नैई होग।

<><><><><><>

Highway

जम्मू-श्रीनगर राश्ट्रीय जरनैली शिड़क जेड़ी उधमपुर कश ल्हास-पस्सियां पौने करी गड्डिएं दी आओजाई लेई बंद ही, गी आंकिश तौर पर खोलेआ गोआ ऐ। राश्ट्रीय जरनैली शिड़कें सरबंधी भारती प्राधिकरण नै भरोसा दोआया ऐ जे शिड़क गी पूरी चाल्ली बहाल करने दा कम्म जारी ऐ ते तौले गै इसी पूरी चाल्ली आवाजाई लेई खोली दिता जाग। उधमपुर थमां स्हाड़े संवाददाता अचिन दुबे दी रिपोर्ट मूजब अजें छड़ा हल्की गड्डिएं गी गै श्रीनगर आहली भेठा जाने ते जम्मू औने दी इजाजत दिती गेई ऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बशकार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>